

E nderuar drejtuese e seancës,

Në hapje të fjalës sime për të treguar koherencën e kësaj maxhorance, po citoj një deklaratë shtypi të bërë shumë vjet më parë, kur ishte një maxhorancë tjetër në pushtet, si prononcohej kjo shumicë kur ishte në opozitë për aktet normative. Besoj se e bëjmë shumë më interesante për një maxhorancë, e cila ua ka nxjerrë fundin akteve normative. Çfarë thoshin për një akt normativ të nxjerrë nga qeveria “Berisha” në atë kohë?! Partia Socialiste në deklaratë shtypi thoshte: “Ky akt përbën një veprim jokushtetues të qeverisë së Sali Berishës, ndërkohë që parlamenti është mbledhur në mënyrë të rregullt dhe nuk na rezulton të kemi gjendje të jashtëzakonshme apo gjendje lufte për ta justifikuar një veprim të tillë”. Para shqiptarëve shtrohet çështja: mund t’i besojmë ne këta? A kanë seriozitet këta, që kanë bërë 4 akte normative njëri pas tjetrit? Ku është serioziteti? Ku është integriteti i këtij Kuvendi, ku kanë ardhur ta diskutojnë? Ky Kuvend ka miratuar një ligj për buxhetin e shtetit që, pa iu tharë boja, është ndryshuar 4 herë. Nuk po flas për aktet e tjera të përkohshme të vaksinave, se janë gati 17 akte normative. Çfarë do të bëjmë në muajt që do të vijjnë, do të diskutojmë për projektbuxhetin e shtetit? Propozimi do të ishte të mos diskutojmë më, por të presim aktet normative të radhës për të gjetur të vërtetën, pasi shqiptarët e kanë shumë të vështirë të kuptojnë që urgjenca e jashtëzakonshme, situata e Covid-it na kërkuaka të miratojmë drone, po na kërkon të miratojmë lekë për teatrin, po na kërkon të miratojmë lekë për rrugët. Pasi janë shpenzuar gati 100 e ca milionë lekë për informatikën, të deklaruara në Kuvend publikisht, na duhen edhe nja 10 milionë të tjerë, pra gati 110-120 milionë dollarë të tjerë, që lëvizin si pa të keq nga andej në krahun tjetër. Sigurisht, ne të gjithë prisnim me shumë kërshtëri të dëgjonim sot nga Kuvendi, sepse u tha nga foltoret e qeverisë, për kataklizmin energjetik, por pati heshtje. Kryeministri nuk foli. Ku vajti kriza?! Ku vajti kataklizmi i ditës së diel, ku të gjithë u traumatizuan, meqenëse Kryeministri ka hallin e panikut? Praktikisht, ky dekret që po diskutojmë, ishte një shans shumë i madh për maxhorancën për të shpëtuar fytyrën lidhur me këtë akt normativ. Flas për ata që kanë fytyrë, se kjo është një sfidë e madhe, sepse flitet se një nga shkaqet kryesore që ka ndikuar, ka qenë pandemia.

Të gjithë me kuriozitet do të prisnin normalisht, meqenëse bëhet fjalë për pandeminë. Jemi dakord për paratë e vaksinave, nuk ka pasur asnjë kundërshti, ndonëse është një rialokim, ndonëse dihej se cila ishte nevoja për vaksinat, dihej se cili ishte çmimi i tyre mesatar, dihej edhe sasia që kërkohet, por një qeveri minimalisht e aftë e ka të llogaritur buxhetin e saj, duke ditur që pandemia nuk ka mbaruar. Po i kthehem çështjes së ditës, për të cilën qytetarët na shikojnë, flas gjithmonë nëse ekziston fytyra, janë 500 të sëmurë përditë të deklaruar me Covid, por unë mendoj se janë shumë më tepër se kaq. Po t’u qëndrojmë shifrave, jo sipas shifrave të mia, por të organizmave qeveritarë, të cituara edhe nga “Zëri i Amerikës”, mesatarja e kostove të tyre të trajtimit është 1 mijë dollarë për njeri. Pra, çdo ditë gjysmë milion dollarë dalin nga xhepat e shqiptarëve. A patë ndonjë shtim apo rialokim të fondeve të rimbursimit për barnat për të sëmurët që janë në shtëpi? Në qoftë se e ka parë ndonjë nga qeveria dhe nuk e kam parë unë, më thoni. Zero rimbursim! Kjo është e vërteta e pandemisë. Janë paratë që shkojnë për vazhdimin e rrugëve, dronet e më the e të thashë. Kjo është e vërteta. Pandemia është vetëm sebeji; është përdorur politikisht dhe vazhdon të përdoret. Sa për inkoherencat lidhur me pandeminë, prapë, në qoftë se kanë fytyrë, se është problem i madh të kesh a të mos kesh fytyrë, këta kanë pasur një zotëri këtu që e kanë vënë në krye të qeverisë, që ka thënë të mos përdorim maska

dhe kush flet për maska, është pjesë e lobit të atyre që shesin maska; s'e kemi thënë ne. Ky ka thënë që s'ka nevojë të testojmë. Kush flet për testimet, është pjesë e lobeve farmaceutike që promovojnë testimet. Testimet ndërkohë i kërkonte OBSH-ja, se nuk donte të nxirrte asnjë kokërr lekë nga xhepi. Ndërkohë që ishin mijëra e dhjetëra mijëra, sepse janë gati 1 milion e 800 mijë që e kanë kaluar e nuk janë në defterët e shtetit, se 180 mijë janë në defterët e shtetit, harxhoheshin miliona e miliona, mbi 150-160 apo 180 milionë euro nga xhepat e shqiptarëve. Ku janë këta në mbështetje të këtij kataklizmi të vërtetë shëndetësor dhe shoqëror të mijëra familjeve, që kanë hyrë në borxhe të jashtëzakonshme, dhe të shumë të tjerëve që në momentin kur dëgjojnë diagnozën për pandeminë, të jeni të bindur që, krahas hidhërimit të madh për problemin shëndetësor, kanë problemin si do t'ia dalin mbanë? Është një mynxyrë që bie në xhepat dhe në buxhetin e tyre. Ku e patë këtu në rialokime? Ku e gjetët mbështetjen për ta? Unë e kuptoj që pafytyrësia është pa limit, por jo kaq! Pastaj vijmë te disa konsiderata që kemi për t'i ndarë së bashku në lidhje me reformën në drejtësi, të cilën e kemi dëgjuar në këtë sallë me tonelata. E kemi dëgjuar këtej mbrapa që dashnorët e reformës për drejtësi vdesin për drejtësinë e re; çfarë nuk bëjnë; janë ata që e kanë marrë në dorë. Çfarë bëjnë me drejtësinë e re këta? Këtu keni disa para, nja 9 milionë dollarë, që janë vendosur për teatrin e ri. Kur janë miratuar këto? Janë miratuar pasi kishin mbaruar të tria seancat në Gjykatën Kushtetuese, kishte mbaruar plotësisht procesi i shqyrtimit, dhe Gjykata Kushtetuese ishte tërhequr për të marrë vendim. Çfarë bënë këta të ndershmit e reformës në drejtësi? Çfarë do të bënin, po të ishin këta dashnorët e reformës në drejtësi? Do të prisnin vendimin e Gjykatës Kushtetuese, që mezi e pritëm, që na lajmëronin çdo ditë që u zgjodh filan anëtar.

Ky lajmi i madh na njoftoj në shqip, por edhe në anglisht. Pra, duhej të prisnit të mbaronte punën kjo gjykatë, se mezi u ngrit kjo gjykatë. Çështje e madhe! Çfarë bënë këta? Mbaroi seanca e fundit më 16-20 qershor, më 22 qershor miratuan aktin normativ, në datën 2 korrik Gjykata Kushtetuese dha vendimin, këta më 1 korrik kaluan paratë e një Gjykate Kushtetuese që i kishte rrëzuar të gjitha. A mund të flasin më për reformën në drejtësi këta?! Çdo i pafytyrë mund të vazhdojë të flasë. E merr mikrofonin dhe këput çfarë të dojë, por kjo është pafytyrësi dhe kësaj duhet t'i dalim për zot e ta mbrojmë. Pra, po e them edhe një herë tjetër që, në qoftë se do të kishin fytyrë, s'duhej të flisnin për reformën në drejtësi. Një proces në Gjykatën Kushtetuese, shumë i qartë, shumë i saktë, i ndërtuar me të gjitha detajet e tij, hajdutët e natës e kaluan një ditë më vonë. Ndërkohë që çfarë kanë parasysht të gjitha rishikimet?! Kanë parasysht situatat financiare, çështje që janë në gjykim apo në shqyrtim, në mënyrë të veçantë edhe në gjykata të tjera, jo vetëm në Gjykatën Kushtetuese, pastaj vihet në sallën e Kuvendit për të kërkuar rialokimin e radhës. Por halli i aferës së madhe të teatrit nuk priste dhe nuk pyetën as për Gjykatën Kushtetuese, nuk pyetën as për drejtësinë e re dhe as për zemërcjerrët: "Ta shikoni ju, të poshtrit, që nuk doni reformën në drejtësi, që s'e keni xhan e të tjera"; kemi dëgjuar dëngla pa mbarim. Ja cilat janë raportet me drejtësinë! Mund të ketë sërish ndonjë të pafytyrë që të dalë e ta mbrojë, por faktet ja ku janë. Këto nuk janë interpretimet e mia, por janë e zeza në të bardhë. Ndaj është shumë e qartë që kur vjen puna për të marrë sinjalin e zhvatjes së radhës, vërvitja është kundër shtetit, kundër Kushtetutës dhe kundër interesave të qytetarëve. Dje ka pasur mbi 500 e ca infektive, po jua kujtoj sërish, pra gjysmë milion dollar në xhepat e qytetarëve; zero lekë në aktin normativ. Lekë për dronë, lekë për teatrin e rrëzuar në Gjykatën Kushtetuese, si një aferë trupërisht korruptive dhe penalisht e dënueshme sa më s'ka (të mos harrojmë edhe IT-në), por asnjë lekë për të mbështetur qytetarët; të gjitha dalin vetëm nga xhepi i tyre. Ndaj, duhet të skuqeshin keqas për këtë gjë.

Ky dekret ishte një shans i jashtëzakonshëm që, të paktën të përmirësonit diçka nga kjo që bëni. Thirrja ka qenë: "Kundër dekretit, poshtë dekreti! Të mos ndreqim asgjë, sepse na lëviz diçka nga ajo llogari që kemi plotësuar dhe nga ajo gjë që kemi planifikuar të futet në xhep.". Këto janë të vërtetat e mëdha, të cilave nuk u ikim dot. Për sa i takon aktin normativ të 99 mijtë që ka ardhur e që po vijnë, se 4 kanë

ardhur vetëm brenda kësaj kohe, asnjëherë mos harroni, ju lutem, të nderuar kolegë deputetë, atë që thoshit vite më parë për maxhorancën tjetër dhe, po të doni, vazhdoni dhe besojeni.